

Gottseibeius

EIN GESPENST geht um in Österreich – *das Gespenst der rot-grünen Apokalypse*.
Ein Stammtischbesuch bei Widerstandskämpfern von Rainer Sigl.

Resi! Bringst uns nu an Schnaps! Den werma jetzt brauchen, weil aans sog i eich: Schlecht schaut's aus, meine Herren, gaunz schlecht! Ihr wisst es, i komm grad aus Wien, ausm Wossaschedl mit seine Großkopferten, und ehrlich, ihr könnt's euch net vorstellen, wias dort steht um unser schöne Heimat, seit dort die Sozis mit de linklinkslinklinken grünen Radikalchaoten konspirieren. Jo eh, es war schon früher net viel besser in der Hauptstadt, mir müsst's des net sagen, i bet scho seit Jahren, aa wos sog i, seit JoaZEHNTEN zur Heiligen Muttergottes, dass der Geist Döblings sich endlich in diesem Gomorrah durchsetzt, oba ans is kloa: So schlimm wia jetzt ... I sog eichs ehrlich: I hob a Aungst um unsa Laund. Jo, es is so schlimm. Waun dieser Waunsinn net aufheat, waun mia des net stoppen, daun droht uns des Ende. Mia, eich, unserm Bezirk, unserm schen Hoamatlaund. Meine Herren, mia miassn ois unternehmen, dass diese rot-grüne Gefoa erkannt und aufgehoin wird und net am End vo Wien ausgehend nu des gaunze Umlaund augsteckt wird. Da Erwin schloft eh scho gaunz schlecht deswegen.

Wia, wos genau? Na, do muass i nu a Schnapslerl. Resi! Oisdaunn. Seit oiso in Wien die grünen Anarcho-Kommunisten mit de Rotn unter ana Decken stecken, geht's bergob mit Recht und Ordnung! Marodierende Moslembanden in den Besslerparks! Asylanter, en gros importiert aus olle möglichen Kontinente, verprassen in luxuriöse 5-Stern-Auffangloger unsare Steuergelder! Und eine Korruption, i sog's eich, ihr kinnts eich des net verstön, oba, psst: Die Bande steckt sogoa mit da Justiz unter ana Deckn! Na selbstverständlich! Sunst gabats jo so manches Politurteil gar net, meine Herren! Diese Politikommissare, diese maoistischen, die do in irgendwöche Untersuchungsausschüsse nix anders im Sinn haum ois

aunständige, fleißige, intelligente Netzwerker anzuputzen! Eine Politjustiz is des! Des grenzt scho an politische Verfolgung! A Hexenjogd auf aunständige Leit, de si wos gschoffn haum! Soin erst amoi söwa wos leisten!

Owa dafür: Haschtrafiken! Jo sicher! Damit sie de Dschankies eana Haschgift nimmer heimlich in de Venen spritzen miassn, sondern glei direkt am Schuihof! Owa des passt eh zu dem, was si diese feinen Herrschoffn für unsa Schuisystem ausdocht hom! Weil, a Leistung zöt nix! Hauptsoch is, ka Schweiners essen! Owa dafia Obtreiben! Kindsmord auf Krankenschein! Schwule heiraten lossn! Owa dafia einen Hass auf die Kirchen, diese Vabrecha! Herrgott schau owa! Waun mia des net verhindern bei de nächstn Nationalratswoin, daun guate Nocht, meine Herren! Wenn mia diese rot-grüne Gefoa net aufgehoin, diese grausliche Gutmenscheninvasion, diese kommunistisch-anarchistisch-chaotisch-linklinke Vabrecherbande, mit eanare emanzierten Karriere-Flintenweiber, die den gaunzn Tog nur intrigiern und gegens „Patriarchat“

daherreden ... waun i des scho hear! Wos soi denn des sei? Soin liaba Kinder kriang, damit man et aussterben anstatt so deppat daherredn! Ois hätt'n mia kane aundern Sorgen! Woits ihr eh a nu a kloans Schnapslerl ...? Resi!

Drum, meine Herren, Prost, und i sog eichs nu amoi im Ernst: Mia miassn unter olle Umständ verhindern, dass dieser rotgrüne Virus sich ausbreitet! Des wär der Untergang, weil mit diese grünen Chaoten ist - kein - Staat - zu machen! ... na guat, jo, in Oberösterreich, bitte, do isses oba hoit GAUNZ wos anders. Oisdann! I hob do übrigens a kloans Prospekt mitbrocht aus der Zentrale, wo unsere berechtigten Bedenken und Sorgen noch amoi sammgfasst san. Weil: Information is gaunz wichtig. Grod jetzt.



HAUPTSACHE, DIE BASIS IST GUT INFORMIERT: *Rot-Grüne Gefahr, sachlich analysiert.*